

# INUIT ATAQATIGIIT INATSIARTUNI



UKA 2023/25.1  
Oktoberip pingajuat 2023  
Asii Chemnitz Narup

## **Pilersaarusiorneq aamma nunaminertat atorneqartarnerat pillugit Inatsisartut inatsisaata allangortinnissaa pillugu Inatsisartut Inatsisaat**

(Piujuartitsisumik ineriartortitsinerup imarisaa pillugu aalajangersaaneq, nuna tamakkerlugu pilersaarutip imarisaa tamanullu saqqummiussineq, immikkoortunut pilersaarusiornermut ataqatigiissaarineq, sumiiffinnik aalajangersaaneq, sammiviliinissamut pilersaarusiorsinnaaneq, nunap immikkoortuinut pilersaarutitut pingaarnernut sinaakkutinik immikkoortunillu aalajangersakkanut eqqussineq, kiisalu suliniutissanut qinnuteqaatinut aalajangersakkanik erseqqissaaneq).

### **(Aningaaqarnermut Naalackersuisoq)**

#### **Oqaaseqartartup saqqummiussaa**

Pilersaarusiorneq aamma nunaminertat atorneqarnerat pillugit inatsimmut atuuttumut 2010-meersumut kingullermik 2015-imi allangortinnertumut allannguutissatut siunnersuut saqqummiunneqartoq Inuit Ataqagiinni nuannaarutigaarput. Inatsimmut atuuttumut allannguutissatut sinnersuutit sukumiisumik piareersarneqarsimasut atuarneqarsinnaavoq. Allannguutissatut siunnersuutit 39-t pineqarput.

Teknikkut allannguutissanik siunnersuuteqartoqaannanginnera aammali allannguutissatut siunnersuutit tunngaviusumik allannguutissanik imaqarnerat nuannaarutigearput.

Suleriaaserput pilersaarusiortarnermillu paasinninnerput maannakkut nutartissavagut.

Piujuartitsisumik ineriartortitsinissaq, kommunit Namminersorlutillu Oqartussat pilersaarusiornerni qitiulissaaq nutaatullu piumasaqaataalersussaalluni. Piujuartitsisumik ineriartortitsineq avatangiisinik mianerinnilluni

# INUIT ATAQATIGIIT INATSIARTUNI



illersuinertermut tungatinneqaannangilaq, aammali inuttut atukkanut aningaasaqarnermullu tungatinneqarluni.

Allannguutissatut siunnersuutit akuerinerat pisussaffimmik nassataqassapput - tassalu tamakkiisumik isiginnilluni inoqarfitsinnik piorsaanissamut.

Suut tamarmik imminnut ataqatigiinnerannik isuma siulitta inuunermik isiginneriaasiannik eqqarsartarneranillu qitiuvoq.

Soorluuna aatsaavissuaq inatsimmut siunnersuummik taakkunanga naaqqaveqartunik siumuuisugut? Taamaassimappallu allamik oqarfiunngilaq: kiisami.

Pilersaarusiortarnermi sakkussaq nutaaq siuariartornermut inuussutissarsiutinillu ineriartortitsinemut tapersiutaassaaq. Tamannalu pingaaruteqaqaaq. Pingaarnerpaajusorli tassaavoq kommunit Namminersorlutillu Oqartussat inuit inuunerannik atugarissaarnerannillu qulakkeerinninniarlutik pilersaarusiortalernissaat.

Allannguutissatut siunnersuutini atatsimut isiginnilluni naliliinitta saniatigut, allannguutissatut siunnersuutit aalajangersimasut ilaat aamma oqaaseqarfigissavagut.

Pilersaarusiortariaatsip marlunnut avinneqaqqinnisaa pitsaasuvoq, tassalu tunngavissanut aalajangesakkat pingaarnerit nunallu immikkoortuinut pilersaarummut aalajangesakkat pingaarnerit.

Maluginiarparput, inoqarfinni mikinerusuni **nunaminertanik aqutsinerup** sukanganginnerulernissaa allannguutissatut siunnersuutini ammaaviginertoq. Allatut oqaatigalugu kiisami pilersaarusiortarneq pillugu inatsit ilisserummik ataasiinnarmik tamanut atuuttussamik periarfissiinani, arlariijutippai. Tamanna soqutiginarpoq nutaaliornerullunilu.

**Nunami sumiiffinnut tunngasut** pilersaarusiortarnermi sakkusangussaaq alla nutaaq. Nunatta isorartoorujussuunera isiginiartussangussammat soqutiginarpoq. Inatsisissatut sunnersuummut nassuaatini nassuiarneqarpoq, kommunini pilersaarutit nuna tamakkerlugu immikkoortunut pilersaarusiortarnermut ataqatigiinnissannut nunami sumiiffinnut tunngasut sakkussaasut pingaarutillit.

Innuttaasut, sanaartornermik suliaqartut allallu **suliniutissanut nunaminertamik kommunimut qinnuteqaateqarsinnaanerit** inatsimmi

# INUIT ATAQATIGIIT INATSISARTUNI



atuuttumi periarfissaareerpoq, kommunalbestyrelsi taamaalilluni makitsinani sanaartornissamut qinnutartumut nunaminertamik qinnuteqartumut inniminniisinnaavoq.

Inuit Ataqatigiinnit pingaartuusoraarput kommunit suliniutissanut qinnuteqaatinik ullumikkumut qanoq amerlatigisunik akuersissuteqartarsimanersut sunillu misilittagaqalernisimanersut paasissallugu.

Kommunalbestyrelsip illoqarfimmi nunaminertat immikkut sanaartorfioqqusaanngitsutut aalajangiiffigeriigaannut tunngatillugu suliniutissanut qinnuteqaatinik itigartitsisinnaanerit kommunit kissaateqarnerat taperserparput. Nunaminertat minnerit tamaasa/tamarmik ilanngullugit sanaartorfigiinnavinnissaat pitsaasuussanngilaq. Inoqarfinnimitamani nunaqqatigiit anersaartorfissaqartariaqarput kateriffigisinnaasaannillu periarfissaqartariaqarpoq.

## **Tusarniaanermi akissutit**

Ilanngussaq 2-mi atuarneqarsinnaapput. Akissutit soqutinarluinnartunik imaqarmata Sanaartornermut Ataatsimiittialiaq inussiarnersumik qinnuigissavarput isumaliutissiissusiornissaminut taakkuttaaq ilanngullugit misissoqqissaassagaat.

## **Naggasiineq**

Pilersarusiortarneq pillugu maannakkut inatsisitsinnut allannguutissatut siunnersuutit annertuut Inatsisartunut saqqummiunneqarput. Assigiinngitsorpassuartigut nutaaliorfiuvoq, aammalu nuna tamakkerlugu najukkanilu pilersarusiortarnerput piujuartitsisumik siunertaqartussanngornerat Naalagaaffiit Peqatigiit nunarsuarmi anguniagaannut naleqqusaaneruvoq.

Taamaattorli Nunatsinni nunaminertat pisiarineqarsinnaannginnerat inatsimmi attanneqarmat eqqissiallaatigaarput. Nunaminertamik atugassinneqartarpugut, tamatsinnit ataatsimoorluta nunaminertat pigigaavut. Inuiattut tunngavipput pingaartut ilaat, eriagisassaq.

Taamatut oqaaseqarluta Sanaartornermut Ataatsimiititaliamut suliassaq ingerlateqqipparput sulilluarnissaanillu kissaapparput. Ilanngullugulu kissaatigissavarput inatsit pioreersoq allannguutissartaalu ataatsimoortillugit tamanut saqqummiunneqartussanngorlugu katiterneqassasut.